

# Majlis Aidilfitri 2009 -

## Erat Hubungan HEPA Dengan Pimpinan Pelajar UniMAP

Mohd Hakam Hassan

15 Oktober 2009, Kuala Perlis - Bersempena dengan sambutan Hari Raya Aidilfitri yang telah disambut pada 29 September bagi tahun 2009 bersama 1430H yang lalu, Jabatan Hal Ehwal Pelajar dan Alumni (HEPA) telah mengambil inisiatif untuk menganjurkan Majlis Aidilfitri HEPA bersama Pemimpin Pelajar.

Majlis satu hari ini, dianjurkan dengan berkonsepkan rumah terbuka Aidilfitri, adalah bertujuan untuk mewujudkan ruang kepada kakitangan Jabatan HEPA, universiti dan Pengurusan UniMAP untuk merayakan dan meraikan Hari Raya Aidilfitri bersama dengan pemimpin-pemimpin persatuan/kelab pelajar.

Bagi menjayakan majlis ini, dua buah khemah telah dipasang di hadapan bangunan Jabatan HEPA di Jalan Serawak, Kuala Perlis. Kerja-kerja persiapan dan menghias khemah-khemah ini telah bermula dari pagi dengan semua kakitangan Jabatan HEPA telah mengembang tenaga menghias khemah-khemah dan menyusun atur kerusi dan meja supaya kelihatan lebih menarik dan



menjelmakan suasana sambutan Hari Raya. Tidak ketinggalan juga penyertaan daripada para pelajar, MPP, pemimpin persatuan/kelab turut membantu dalam membuat persiapan. Menjelang tengahari, persiapan fizikal yang melibatkan khemah, kerusi, meja dan sistem siaraya telah selesai dan persiapan untuk menyiapkan dan menyusun atur juadah pula dilakukan. Segala-galanya dilakukan secara bergotong royong. Antara menu-menu juadah yang disediakan adalah Bihun Sup, Sate, Nasi Himpit, Ketupat dan kuih-muih.

Menjelang jam 2.00 petang khemah-khemah bagi majlis Aidilfitri mulai menjadi tumpuan pemimpin-pemimpin persatuan pelajar, para pelajar UniMAP, kakitangan Jabatan HEPA dan juga kakitangan-kakitangan jabatan UniMAP yang diundang. Turut diundang ke majlis ini adalah Ketua-Ketua Jabatan UniMAP dan pelajar-pelajar Antarabangsa. Kesemua tetamu yang hadir

dihiburkan dengan persembahan nyanyian oleh pelajar dan kakitangan UniMAP sambil menikmati juadah yang disediakan. Dianggarkan hampir 350 orang hadir dalam majlis ini. Turut serta bersama meraikan para tetamu dan pelajar-pelajar yang hadir adalah Encik Razli Ahmad, Dekan Jabatan HEPA. Majlis ini berlangsung selama hampir 4 jam dengan suasana yang penuh kemesraan dan meriah sekali.

Ternyata majlis ini telah berjaya mengeratkan hubungan di antara kakitangan Jabatan HEPA dengan para pemimpin pelajar dan pelajar yang hadir. Adalah diharapkan agar majlis ini akan merintis satu jalinan kerjasama yang erat antara kedua belah pihak dalam merangka, merancang dan akhirnya melaksanakan program-program yang menyumbang kepada pembangunan pelajar dan jabatan HEPA itu sendiri.

